

Das ander Buch/

Wie man das Golt durchs

Aqua regis gar rein vnd fein ma-
chen soll.

Dieweil das Aqua Regis / allein das Goldt/
vnd nicht das Silber angreiffet / so acht ich / es möcht durch
diesen weg / das Golt am reinsten vnd gar fein gemacht
werden / Nemblich also : Nimb gut hoch Golt / setz es auff ei-
nen guten darzugemachten Test / laß mit reinem Bley dar-
auff rein abgehen / daß du gewiß bist / daß kein Kupffer darben blieben/
als dann verlaß das Golt auff einem Schirben / biß es schmeidig
wirt / dann schlags dünn / glües vnd thus in einen guten beschlagnen
Glaszkolben / geuß darauff Aquam Regis vnd soloir das Golt alles
auff / was sich nicht soloirn wil vnd im Glaszkolben ligen bleibt / das
ist kein Golt / Dann geuß das Aqua Regis / darinn das solvirte Golt
ist / rein ab / vnd thu es in einen andern Glaszkolben / vnd zeuch das Was-
ser darvon / so bleibt das Golt im Glaszkolben / das geuß zusammen vnd
verlaß rein : Dieses Golt also zugerichtet / mag für Feingolt ge-
theilt werden / dieweil das Aqua Regis nichts dann allein Golt vnd
Kupffer angreiffet / vnd das Golt erstlich auff dem Test vom Kupffer
rein gemacht wirt / so kan nichts anders dann rein Golt auß dem Aqua
Regis kommen. Wie aber nun gute Aqua Regis / wie ichs selbst
gebraucht hab / solln gemacht werden / dessen bist
du oben außführlich berichtet
worden.

So viel hab ich günstiger Leser / von den Goltstücken / vnd
derselben Arbeit / gemeinen Berckleuten vnd jungen Probi-
rern / zu fernerer vbung vnd nuß / beschreiben wollen / dem mag
ferner nachgedacht werden.

Das